

四庫全書

集部

欽定四庫全書

空同集卷十七

明 李夢陽 撰

五言古

田居左生偕二李見過

習宦非我長官久計轉拙遭斥還田廬獲與初念協樹
藝良有期農事固堪悅飄飄綠原風晶晶明川月披襟
恣吾適既夏不知熱回思行役日寒暑靡得輟踈懶古
雖鄙任性亦可說膏晷矧豐蔚積潦復淒冽白日皎在

茲停雲靜如結為謝二三子努力慰衰劣

其二

去官今七暑漸與農務親隨宜諳土性言話群野人時
或遡微風行歌響空榛先民邈何攀慨焉傷我辰慨傷
適誰知所有二三賓文論日往來炯炯高義伸炎雨回
衆姿涼飈起修畛兀然林木下日入忘歸輪玄蟬夕益
聒去鳥一何頻野行畏多露無使侵衣巾

城南別業夏集

田居不自娛况兼林水情事茲暑衣晨而與佳士并挈
棹溯芊緜臨墮弄澄清娟娟浴沙鷺交交鳴枝鶯雖非
巖潭區閒曠足我營菰蒲裊寒陰隕果時自驚有室矧
伊邇遐哉謝塵縈

其二

荷鋤修高詠濯纓肆佳吟疇知稼穡場乃爾蒹葭侵步
風逾曾堤徙筵趨重陰於情既有託矚寓良自深逶迤
波上雲征征草間禽消臺信已古魏城方肇今驗物果

足遣孟乾聊復斟

慶都篇

於昭開帝則蕩蕩協欽文高辛初纘服大舜復升聞瞻
依太古日悵望春空雲緩策遵墟里翱翔詠放勲

帝乙

此以下三首皆為武宗大婚而作時正德元年八
月之吉

帝乙歸元歲為汭降高秋白霧凌蒼壁文烟結綵樓楓

陌三公引雲衢六馬遊行當瞻月馭佇想詠河洲

黃衢

黃衢會日月紫氣懸陰陽冉冉神龍下
英英朱鳳翔蘭烟凝玉閣桂月滿金堂
禮先歆九廟德已合無疆

桂宮

桂宮新降馭蠶室爛生氣曳綈成漢業
采葛相周文會奉重輪日先瞻五色雲
秋明天路夕瑞雨碧氤氲

十二月朔

積陰凌紫極玄霧暗三辰黃龍游帝時萬乘若浮雲六
虯何蚺蜺雜沓走天神明王熙庶載至敬達郊禋玉輦
親牛豕重瞳注鹿群精誠先百物咸德屆犧人揚鑾回
御道九宇冀陽春

夏歌

積潦溢廣澤炎雲翳崇臺玉階履綦絕紫殿生莓苔螢
流踈竹靜風動綵幃開佳期悵千里竟夕以徘徊

湘妃怨

采蘭湘北沚，寒木澧南潯。
淶水含瑤彩，微風託玉音。
雲起蒼梧夕，日落洞庭陰。
不知篁竹苦，惟見淚斑深。

春曲

萋萋百尺臺，南臨大道開。
月明珠箔捲，塵暗寶車來。
豪雄五都俠，意氣萬人推。
帶醉穿林徑，垂鞭拂閣梅。

結客少年場行

燈如列宿行，月似九秋霜。
番番七貴兒，燦燦五侯郎。
雜沓凌香陌，徘徊競夕光。
各攜黃金劍，結客少年場。

俠客行

幽并豪俠地燕趙稱悲歌千金市駿馬萬里向交河公
卿贈寶劍君王賜玉戈捐軀赴國難常令海不波

從軍行

棄家從上將報主掃邊戎弩滿常隨月旗翻數起風右
指昆邪盡左盼月支空馳名紫塞外開府玉關東不逢
百戰日誰識萬夫雄

出塞曲

單于冠邊城漢將列長營旌旗蔽山谷鉦鼓晝夜鳴
乘我浮雲騎轂我明月弓奇兵左右出長驅向雲中彭彭
陣結虎颯颯劍浮虹一戰臯蘭滅再戰沙漠空歸來獻
天子長揖不言功

銅雀伎

帷飄雀臺上絃奏舞衣前羣悲一以望春草為誰妍芳
歲銷蘭怨流塵集錦筵為問西陵道孰與漢家阡

漳津夕眺

揚舠亂北渚靡蓋望西陵帳殿牛羊下歌臺麋鹿升日
夕松柏路蕭蕭響風樹連沙改故浦空山沒蒼戍徘徊
望霸氣鄴城在何處

呂仙祠

孤遊逢呂跡永逝感盧生眷彼炊梁術契我遺世情蒼
山故國道落日邯鄲城陰陰祠宇夕宛宛曲池清不見
金芝侶誰聞朱鳳聲田鼃穴桂壁野葛蔓松楹寧知往
來者不是寐中行

三日河上宴集

觸霽邁芳垌修祓臨長泊雖非曲觴飲聊異秉蘭戲波
延拾翠舸岸匝尋青騎羽爵戀馳景鸞蕭劇春思群謠
狎鳬鴈撫適懽同志亦以擴凡超流連豈吾事

詠樂溪

濯足荒溪口延望大江潯石樹環碧綵泉潭生翠陰經
亘涉清漣沿洄登素岑日暮樵響絕但聞山水音琤琤
響環珮泠泠彈玉琴鴻雁尊者飛麋鹿聚空林而子豈

不樂其如兼善心

乙丑除夕追往寫憤五百字

憶昔蕤賓初皇疾輟臨伏維日白氣亘黑風復排蕩俄
傳天柱折忽若慈母喪帝本堯舜姿末履轉清伉歛衽
接耆碩高出文景上兩宮悅孝子九廟歆流鬯毅然整
六師霹靂無前向豺虎遁朔漠鯨鯢蟄溟漲困冲不凝
壽日表空殊相蜿蜒湖中龍一夕拔驚浪回首哭蒼梧
魂斷湘南瘴念昨下明綸臣也誠無狀誓死叫閭闔伸

頸甘礎盎梁竇勢如灼漢廷色惆悵皇乃西園游召
彼侍供帳從容杯酒間似讓還非讓未剖青瑣封已
下金雞放臣某詎足惜統體闕衰王歷數古明辟聖
節疇能尚逝欲碎臣骨顙帝不得廷攀髯眇莫及痛
哭橋山葬玉光動前星朱符闡靈貺主器難久虛勉
起答羣望金木欵為崇太白晝相抗大敵敢余侮吾
徒盡乘障嗚呼榆臺役棄我六千壯踉蹌戰士骨躡
跋將軍輶二豎固輕率腐屍亦云當所恨國威辱北

鄙氣悽愴鉦鼓凝皇情何以慰宸况悽悽建未月臨
門遣征將紆袴作元戎京軍本浮宕翻使沿邊卒束
手遭箠掠揭嶮雲中城誰復扼其吭敵來風雨聲敵
去橫拍唱千村與萬落人烟莽蕩蕩嬰兒貫高槊志
婦經衣衿狐狸叫破壘落日悄潸沆此輩誠鼠竊反
覆亦難量騏驎駕鹽車虛名縛骯髒世豈乏頗牧賤
或執鞭杖瑣瑣登壇子飽之則飛颺吁此良太枉國
愜何由暢水旱而秋雷陰陽迭驕亢皇天雖至公視

之但塊塊臣當歷服始謬進大夫行退朝實憤切欲吐
畏官謗武王秉黃鉞師事大公望烈聖構梁棟駕馭亦
英匠先帝升遐日臨榻召三相

贈劉主事麟

駕舟越洪川飄風揚其波白日不可駐浮雲一何多寥
芳涉北沚采蠹陟南阿悵我平生友傷此欲如何

其二

濛濛孤舟夕橫笛坐烟浦秋綠被汀沙落鴈不可數烈

調千行雲激商復流羽曲竟和者誰佳人淚如雨

湘江吟

對酒歌綠猗歲宴懷佳人山寒翠袖薄微霰沾衣巾空
持紫鸞簫欲致愁無因日暮湘江曲浩蕩烟波春

春曲

維南有曾城下瞰梁王臺雄構翳雲日歌鐘暮徘徊芳
草徧舊畿山川邈悠哉

其二

春城花烟滿香靄生夕陰白馬繫芳樹繡袪彈鳴琴
樽蒲少年子一擲千黃金

其三

綺閣俯通闕後有百尺樓並坐紫羅茵雙引青玉甌
楊花起薄暮粼粼縈芳洲

其四

菁菁艷陽月鬱鬱美人思游絲罥白日炯若春風姿
零落垂手舞空傳白紵詞

其五

借問美人居云住城東隅背有桃李館前臨車馬衢十
三妙歌舞十五冠名姝

朔日

朔日悲風起空除落葉平猶聞砧杵急已復剪刀鳴一
夜傳霜箭黃雲滿塞城

槿樹

槿樹依空砌寒時尚著花未能堪暮色徒自絢朝霞寄

語閨中女無多鏡裏華

槿園

槿園秋氣夕唧唧寒將聚風回啼欲斷月落歸何處爰
悲在堂吟復詠山樞句感爾中夜興微霜下庭樹

春情

俗縈一何縣駕言春已分綠郊鮮行輪朱樹花將紛鳴
鴈起前墟浮陽謁東瀆徙倚孤臺側佇迴送征雲

遊寺

褊心儔輩寡幽境莓苔步緜鬱倚磴歇馮孤眺迫屢洞
塔陰古宇芬蘿裊澄樹佇觀野禽哺此外豈吾慮

昇天行

市居苦煩溽陸處懷清波緬思溪壑側丹崖卷曾阿仙
人桂樹下窈窕攀青蘿我獨塵歌內營營欲如何

春遊篇

古臺悲帝子歌吹餘春愁草綠夷梁野雲浮河海流擊
壺詠四澤鼓鐘眺三洲板條已無那駕言誰倦游

四清篇

盤松屹當戶修筠靜依檻
羈遠桐絲澀蕭瑟鶴思減
歸傷園塢廢坐令荒穢斬
彈曲憇踈蔭皐喉清露湛

正德四年七夕上方寺作

逸人厭囂俗達士樂閒勝
乃茲城中林而非車馬徑
積雨豁新霽雲石掩秋映
微陽下孤塢潦水夾明鏡
已疑塵寰隔况覩蓮宇淨
豈惟慕真覺亦以叩詮證
玄蟬共西夕浮雲本無定

戊寅早春上方寺

逾年罔涉茲過之門巷疑匪畏霜露辰肯與春事期徑
蘭芊故叢苑松發新蕤陟邱念廢居升危眺回漪抱以
幽曠豁情緣悽愴移驚風遞虛塔振振空廊悲得遣復
安較勞生良爾嗤

辛巳春夕集上方寺

晨飈奮以厲夕林回晏溫郊遊悵伊阻駕言乃松門春
湖靜瑤宇塔蘿裊清樽遙睇被原草近蹇臨水蓀花雨

時自落法雲凝復奔淹留遲寶月破此人徑昏

山中

山中雨乍歇一夜瑤草長風吹翠巖竹下應石瀨響時
來展書坐悠悠絕塵想

置薪

讀書古木陰置薪倚其根露零石徑滑雲起溪日昏白
虎啓巍觀金馬開高門君自薄簪紱難稱國未恩

九潭詩

峒峒千仞嶺下有百尺潭夕風起微瀾泚泚動晴嵐俯
之鑒我心佇翫雲波涵流蕤颺寒清躍魚手可探蹊暝
樵響歇猿鳥來相叅寄語泥中物長蟠恐未堪

空同集卷十七

欽定四庫全書

空同集卷十八

明 李夢陽 撰

七言古

漢京篇

漢京臨帝極，複道衆星羅。
煙花開甸服，錦繡列山河。
山河自古稱佳麗，城中半是王侯第。
峻閣重樓夾道懸，雲房霧殿森虧蔽。
牧豚賣珠登要津，樊侯亦是鼓刀人。
時來叱咤生風雨，奄見吹噓走鬼神。
平津結兄蓋，侯弟杯

欽定四庫全書

空同集
卷十八

酒相看何意氣執鞭盡是虎賁郎守門不說長安尉長
安烽火入邊城挺劍辭君萬里行去日千官遮馬餞歸
來天子降階迎朱弓尚抱流沙月寶鉞常飛翰海星不
分燕然先勒石直教麟閣後標名豈知盛滿多仇忌可
惜榮華如夢寐地宅田園奪與人丹書鐵券成何事霍
氏門墻狐夜號魏其池館長蓬蒿三千劍客今誰在十
二珠樓空復高後車不戒前車覆又破黃金買金谷洛
陽亭榭與山齊北邙車馬如雲逐陰郭豪華真可憐雲

臺將相珥貂連當時却怪桐江叟獨着羊裘伴帝眠

明星篇

正德間早起聞內教場砲喊之聲作此篇也

明星出地一丈高天門沈沈魚鑰動沙堤露下玉珂寒
直廬鷄唱金蓮重千門萬戶曉鐘發明星漸高河漸沒
燦爛疑侵翔鳳樓依稀故抱飛龍闕鳳樓龍闕帶曾城
翠輦朱衣夜夜行黃昏競奏催花宴天明猶聽打毬聲
蘭烟桂火輝如日明星迢迢照不入百子池頭青草生

長信宮中紫苔集草色苔香秋復春此日乘槎若問津
明星曉落宵還見白髮黃金愁殺人

楊花篇

洛陽三月東風起楊花飛入千門裏只見朝縈上苑烟
那知夕逐東流水苑煙流水無休歇暖日輕盈度仙闕
趙女瑤臺貯綵霞班姬團扇啼明月綵霞明月幾沈輝
陌上行人亂撲衣征夫柳塞愁看鴈少婦深閨懶上機
柳塞香閨萬餘里草色連天度隴水玉門關外雪猶飛

章臺樹裏風先起誰家浪子千金馬
平明挾彈章臺下頭上羅巾玳瑁簪
腰間寶鉞珊瑚把踏絮來尋賣酒家
持香坐調當壚者當壚美女怨陽春
笑掇楊花襯繡裯青樓薄暮難消遣
白雪漫天愁殺人冥冥漠漠春無極
此時惟有楊花色一朝風雨靡蕪爛
獨慘垂條三歎息

去婦詞

正德元年戶部尚書韓文暨內閣師保等咸相繼
去位李子作此詞也

孔雀南飛鴈北翔含顰攬涕下君堂繡幙空留並菡萏
羅袪尚帶雙鴛鴦誰不羨人生一別何由見
只解黃金頃刻成那知碧海須臾變賤妾甘為覆地水
卽君忍作離絃箭憶昔嫁來花滿天賤妾卽君俱少年
瑤臺築就猶嫌惡金屋粧成不論錢重樓複道天中起
結綺臨春照春水宛轉流蘇夜月前萋迷寶瑟烟花裏
夜月烟花不相待安得朱顏常不改若使相逢無別離
肯放馳波到東海薄命難教娣姒知衰年恨少姑嫜在

長安大道接燕川鄰里携壺舊路邊
妾悲妾怨憑誰省
君舞君歌空自憐
郎君豈是會稽守
賤妾寧同會稽婦
郎乎幸愛千金軀
但願新人故不如

蕩子從軍行

蕩子從軍行者本駱氏蕩子從軍賦也余病其聲
調不類於是改焉

天驕十萬起妖氛
漢騎三千掃陣雲
隱隱地中鳴戰鼓
迢迢天上出將軍
邊沙遠離風塵氣
塞草常萎霜露文

蕩子辛苦十年行回首關山萬里情才聞突陷賢王陣
又遣分圍右校營紛紛鐵騎朝常警寂寂銅焦夜不鳴
滄波積凍連蒲海雨雪凝寒遍柳城地分玄微指青波
關塞寒雲本自多嚴風凜凜將軍樹苦霧蒼蒼太史河
揚麾拔劍先挑戰征旆凌沙犯霜霰樓船一舉爭沸騰
烽火四連相隱見戈文耿耿懸落星馬足駸駸擁飛電
終當取俊效先鳴豈暇論功稱後殿征夫行樂踐榆溪
倡婦銜怨坐空閨靡蕪舊曲終難贈芍藥新詩豈易題

池前怯對鴛鴦伴庭際羞看桃李蹊
蕩子別來年月久賤妾深閨更難守
鳳凰樓上罷吹簫鸚鵡杯中臨勸酒
同道書來一鴈飛此時絨怨下鳴機
已剪鴛鴦帖夜被更薰蘭麝染春衣
屏風宛轉蓮花帳牕月玲瓏翡翠幃
箇日新粧如復罷祇應含笑待郎歸

洛陽道

桃花馬金絡頭白面郎紫貂裘
三月洛陽道垂柳蔭清

溝溝水東流不記春花開
花落幾迴新東風日暮楊花
起愁殺高樓獨倚人

野田黃雀行

鶉奔奔鵲僵僵來逢野田雀
相逐過南疆北地苦霜雪
南地多稻粱人生美食被綺衣
不及鴻鴈能高飛鴻鴈
下天遭網羅不食柰爾黃雀何

苦寒行

太行之山何崔嵬天寒谿谷禽獸饑
黃熊赤罷力相食

翠衿繡翼徒南飛啄食飲泉百意足野田稚子寒無衣
張羅掛畢伺鳥雀口作雌雄鳴且悲鵲鴉小鳥鼓翅落
鼎食之家意不樂頻箸待爾盤品錯奏應鐘開玄堂璫
幃錦幄冬夜長微禽效體樽俎光禿鶯鴛鸛當簷翔

結交行

昔時韓生有艷妻其君使築青陵臺南山有鳥不肯來
烏鵲雖小禽不受鸞鳳猜以此築臺成二人葬寒灰舉
國見之悲且哀悲且哀斷人腸墳上連理樹變為兩鴛

鶯搥吭交頸綺翼張春風蛺蝶花飄揚君不見酈呂結
交日朝為刎頸暮拋擲如此結交復何益

梁園歌

朝發金臺門夕度博浪關黃河如絲天上來千里不見
淮南山淮南桂樹弄婆娑掛席欲進阻洪波我今亦作
梁園歌梁園昔有信陵君名與岱華爭嵯峨三千珠履
不動色屠門執轡來相過功成不顯涕滂沱青蠅白璧
一何多我為梁園客不登梁王臺錦帆揚州門一去何

時迴荒烟白草古城沒登臺望之令心哀令心哀歌且
謠迷塗富貴苦不足寧思白骨生蓬蒿人生三十無少
年積金累玉空煎熬獨立天地間長嘯視今古城隅落
落一堆土千年誰繼白與甫攬淚浮雲灑煙莽灑煙莽
風吹卷波濤沈吟投箸不暇食蹴天濁浪何滔滔君不
見昔人然諾一相許黃金斗印如秋毫

梁園雪歌

昔對燕山雪岩堯白玉京曉曳王恭氅飄飄入紫清今

為梁園客獨對梁園雪黃雲索寞連滄海九疑望盡飛鴻絕

其二

飄風動三極霏雪灑煙海天地倏低昂虛無變光彩梁臺空嶠屺枚馬今安在飛光超忽若游龍我欲從之問千載

世不講曹李詩尚矣內弟曾余河上能章章道也驚有此贈

曹植白馬篇李白飛龍引流光耀千古不與日星隕世
人捧心戚翻為西子哂左生三十歲雅志測沈冥鯨飲
傾百川自稱吾酒星今朝理酒船來過子雲亭高談吐
太白八斗揮雷霆霜雪連山海氣惡柳枝簌簌冰花落
此時萬里無人煙誰信清吟動池閣動池閣生暮愁雪
澤古龍寒啾啾他時爾獻三都賦我釣長江萬里流

酬錢水部錫山之招

無錫錢少陽招我棲錫山江上千萬峰裊裊凌江關下

有震澤湖旁有太伯灣昔時蘇公慕陽羨陽山錫山對
相見我獨何為阻茲游西風吹心落吳甸我問錢少陽
汝今在何所振轡金馬門看花曲江潯徐庶竟辭劉張
翰憶吳州鵝湖雲嶼間鴻山林樹秋我今放浪黃河隅
遙憶白粲心鬱紆幾時彈劍賦歸來與爾共醉芙蓉湖

寄錢水部

我今在何所牧釣睢川陽子今在何所飛蓋臨東方高
山大澤不我限胡為日夜遙相望鴻鴈日南飛不寄一

封書離別春草生相思秋葉踈朝看渤海雲暮眺滄洲
月樹寒多天風相思幾時歇

十四夜脩然臺

正德初李子潛河上築脩然之臺

中州可以望天地黃河之水何恍惚為此築臺臨其涯
坐看月生復月沒今年中秋地無雲綠烟溟濛海月發
金流水波貝宮湧蛟龍出遊爭海月我欲乘槎捉蛟龍
浪高力微懼滅歿嗚呼滅歿不足惜只恐竟無益

其二

蓬池有嘯臺夷門有吹臺二臺突兀眼前一杯土英雄
落莫成今古我今有臺不嘯復不歌月高霜白如夜何
臨洪河望四海山川悲月不改昔日芒碭五色氣煙銷
浪滅今安在

十五夜

去年燕山南易水北終宵待月不可得露雲崢嶸蔽瑤
闕頓箸停杯三太息今年有月復有臺海門煙滅沒四

顧天地開何為不飲歌且哀君不見少年時馳逐京洛
陌夜夜謹呼山月白揮鞭不顧五陵客月圓月缺天有
之人生豈復如舊時不如采取靈兔藥富貴浮雲豈足
樂

十六夜

唧唧復唧唧當戶鳴促織月中何所有云是仙桂枝此
桂開花復結子安得夜夜常不虧君不見梁園酒一斗
錢十千昔時信陵有賓客不飲豈足稱豪賢直須酩酊

卧草澤明日射獵睢陽川

十七夜

三日不見月見之半輪沒清光猶能鑒毛髮不愁倒卻
婆娑樹只恐損破清虛闕清虛闕在何許白氣熒熒走
金虎雖有三萬六千戶手提玉斤不敢補涼風颭颭自
西來吹我衣心獨苦長歌潛行攬洲莽

客有笑余霜髮者走筆戲之

客且盡手中觴不須笑我頭上霜客盡觴且停之聽我

高歌霜髮詞君不見天上烏東跳西走不相待又不見
黃河水萬古滔滔向東海我身不是南山松又不是山
上峰奈何與少年爭春風鬪鷄走狗傾春紅君不見昔
時孔仲尼轍環顛顛無已時盜跖殺人如亂麻錦衣高
壽顏回嗟聽我霜髮歌歌短情則多軒車駟馬渾等閑
何似日銜金叵羅金叵羅青玉案何以贈客錦繡段頭
白頭白何須歎

戲作放歌寄別吳子

吳名廷舉字
獻臣蒼梧人

惟昔少年時彈劍輕遠遊出門覽四海狂顧無九
州獻策天子賜顏色錫宴出入黃金樓揚鞭過市
萬馬避半醉唾罵文成侯結交盡是扶風豪片言
便脫千金裘彎弓西射白龍堆歸來洗刀青海頭
崑崙河磧不入眼拂袂乃作東南游江海洶湧浸
日月島嶼感沓混吳越匡廬小瑣拳可碎鄱陽觸
怒踢欲裂澤中龍怪能人言噴濤吹浪昏漲天大
鵬舉翼四海窄笑爾弋人何慕焉東湖子君非漁

忍聞穆取位之丈夫余亦豈卑卑與世而浮沈恟復共
鬪非庸劣廉藺終投萬古欽攀鱗掃氛代不乏我豈復
戀頭上簪鹿門黃犢穩足駕商巖紫芝山固深有飛倘
附秋空音

冰車行

黃門飛鞚西北趨白馬如龍血如珠萬人齊呼冰窖開
大車小車如山來但見風行九市陌寧知玉積五侯宅
道傍喝士僵闌干脣乾口燥真大難侯門宴罷夜烏起

朱殘粉落明星裏君不見積氷化作堂前水

鹽井行

山頭井乾生棘蒿山下井塌不可熬官司白牌促上庾
富家鬻田典耕牛貧家無牛典兒女誰其使之華陽賈
華陽賈子多少年擁金調妓高樓邊夜馳白馬迎場吏
曉貫青絲還酒錢君不見場吏乘酣氣如虎鹽丁一語
遭華楚

清夜引

桂魄團團霜兔泣玉龍夜吟冰喉澁仙人起踏白芙
蕖手撚一枝珊瑚株伏猊香噴紅氍毹蠟鳳啼春蝦
捲鬚九華丹焰奪行月五虬轆雲聲軋銀箏翠管
聲咿啞繁謳雜舞懽意匝盤中紫棗大於瓜誰其擎
之萼綠華雙桂逶迤頭兩了密情芳緒芳且嘉瓊城
夜半重重閉偷挑小兒安得至

沈大夫行

沈大夫遺我以凜冽玉壺之冰報汝以離離朱瑟之

繩繩以發凌雲絕響之妙曲冰以滌卓犖硯礪之清
膺此曲可以掘地懿揚天經宣融風召遐齡奏之敬
姜室允宜孟母庭沈大夫奉詔且還家松江鱸魚白
躍玉土居斫笋如斫麻烹羊擊鼓會親戚太守長吏
爭趣車猗乎嘉哉男兒生不顯親譬如錦衣夜行雖
貴何足誇

雪山歌送萬子

雪山高哉巖乎岌兮吾不知幾千萬仞但見雲峰之崔

魏巖冰陵兢縞壑焚石晶矐而萃律兮懸猱不得度飛
鳥何由迴大峰如老翁冕珮凌紫埃諸峰似兒孫羅列
芙蓉開江日洶湧地軸動孤光倒曳生奔雷度乎危哉
雪山之高不可以攀陟斧斤不入松柏如麻霜幹翳蔽
雲根槎枒滲膏結苓實輪囷走龜蛇君今策駟過其下
車徒滾滾如飛沙何不斲取松下苓獻之堂上翁上以
介壽考下以召禎祥噫吁戲雪山之高吾不可得而名
惟有峨眉玉壘萬古遙相望

廣州歌送羅參議

麗哉遐乎廣之為州兮闢炎區奧雄跨乎南陲天作五
嶺奠玄武排空下走何崔嵬拓邦幾千祀浩蕩人文開
秦還漢往不復識但見古城蒼蒼生綠萊上則盤岡曲
丘龍蜿蜒虎蹲其下膏場繡澮曖而渟洄水銀丹砂布
平地珍錯美翅犀與瑰夷舲賈舶競追逐白首浩淼誰
曾回土產之異尚如此何況四民者挺然叅三才君今
綰牒向南去清風吹袂心悠哉崢嶸五羊城側有千尺

吉室曩昔聞君坐其上醉睨滄溟如一杯是時榕蹊雨初
霽茉莉霜成堆君嘗夢遊而神適兮豈知七載還復來
男兒成名貴及早英雄多少埋塵埃羨君青鬢結明主
出叅方岳聲如雷金章紫綬不可以倖致如君者謂非
歷塊之龍媒羅浮三千六百丈屹崒倚窮隈巨鰲戴之
與波下上三十五蓮峰照耀雲中輝羣仙跨飛龍流影
亂巖扉我欲從之歎無術送君翹首空徘徊

空同集卷十八

欽定四庫全書

空同集卷十九

明 李夢陽 撰

七言古

桂巖行

白龍不識漁溪惡化為魚服遭人縛黃髮先生困泥阻
白馬小兒氣揮霍道傍朽木藏蛟龍霹靂猶聞夜火紅
寄謝少年諸數公貧賤豈必皆愚蒙桂巖紫芝春盡發
騎驢且覓商山翁

崖松行

峭石從巖木相膠孤松挂日崖光幽朔風北來霜雪暗
山深草黃途路修此時亭亭見松意排空柯幹流雲氣
大厦傾時梁棟急君看此物終難棄

丹穴行悼丘隱君

丘名琥號松山夷門隱人也

北風颯颯吹丹穴幽篁梧樹寒蕭屑孤鳳威垂眼流血
蘭陽丘公昨謝世使我杯乾已數月出門騎馬向誰適

世事悠悠忍能說薄俗
蹉跎始為敬老夫平生性懶拙
後生譏訕轉多口白壁青蠅從點缺
宋門汪隆頗好事
見我握手肝肺熱近亦客死臨清州
北望傷心路途絕
可憐親友日零散
老成耆舊灰燼滅
不爭汝曹灰燼滅
又值天寒地欲裂

苦寒行

前日雪落傷麥根
北風刮地天色昏
沙飛石走拔大樹
雪積林坳出無路
城中死者不知數
我歸三年河不凍

今年冰堅車可渡觸面慄慄厚地裂四顧乾坤莽明滅
尺薪粒米貴如玉君不見日晚空牆貧士哭

夜行歌

月輪未安光已皎我行夜出夷梁道力疲足酸堤上坐
黃狐怒立啼向我宋家宮殿盡瓦礫陂湖燒鹽焰婀娜
忽憶東京全盛時月行對此誰能那

古白楊行

百泉東岸三古楊下枝掃拂書院牆上枝瑟瑟千穹蒼

空山野陰雷雨黑柯幹冥冥動山壁剪伐難為棟梁用
盤踞翻逃斧斤厄但見白日悲風發寧知六月撐霜雪
煙色慘愴精靈聚孤根倔强源泉裂憶昨訪古憩其下
居人不敢留車馬落籜尚禁牛羊食汙穢頗遭縣官打
丞相古柏霹靂碎將軍大樹空蕭灑岡頭石路莎草長
孫邵李許同一堂春風漂泊予到此不見古人惟古楊
古楊蕭蕭暮流急波翻浪倒蛟龍泣衛女幽憂拾錦花
逋臣寂寞愁難立君不見太行羊腸莫比數上有毒蛇

下猛虎樵斤獵火不虛日桂柏椅桐氣悽苦嗚呼楊兮
楊兮爾何盤根據茲土

泉上雜歌

游子樂游復長歎臨深坐歌白石爛石泉漠漠常東流
我今胡為坐泉頭渚花冥冥野陰薄谿日杲杲蒼雲愁
君不見古來爭戰地山寒雪暮風颼颼

其二

美人被服貂襜褕春日遊行春水曲綠蘿無煙山雲暝

扣石長歌歎幽獨撥刺紅鱗錦湍游我欲釣之且復休
金盤玉箸在何許為爾臨淵淚如雨

自從行

自從天傾西北頭天下之水皆東流若言世事無顛倒
竊鉤者誅竊國侯君不見奸雄惡少椎肥牛董生著書
翻見收鴻鵠不如黃雀啅撼樹往往遭虺蜥我今何言
君且休

大梁城西門行

水門堤口雙柏樹種之何年不記數風飡雨蝕生氣微
枝葉半凋委官路烏鴉螻蟻復啄食我行見之淚如注
古來根本忌先撥嗚呼柰此棟梁具及今可為當語誰
半夜吞聲向北去

羈旅翁行

自焚闕里手植檜天下斯文忽墜地錦衣使者日旁午
青衿胄子時流涕靈風翩翩起白旒五月黃塵暗天際
君不見河上羈旅翁時乖此老遭拘絀

寶刀篇

我有吳王雙寶刀龍鱗雪花爛照地奉君清宴可君意
佩之十年不曾離黃金盤帶白玉鈎出入魍魎魑魅愁
功高見疑反遭怒此物拋擲今兩秋丈夫生世輒軻亦
如此終日戚戚何為爾

秋夜歎

君不見梁上蝠飛走掠蠅虫蠅虫四散不受掠而我胡
在縲紲中豈卽運命委霜雪要知腐草生華風沉吟徹

夜不能寐此時天風雨將至但聞虫聲啾啾復唧唧鴻鴈嗷嗷忘南北

其二

臭虫多足蚊有翅當我眠時忽而至憤悶披衣坐歎息
竟夜搔爬無氣力寒霖蕭蕭響荆棘君不見吹燈無煙
四壁暗野狐跳梁鬼啾唧

思歸引

疾風吹寒破南極凍雨濺濺山樹黑天昏歲暮百憂併

中夜悲歌淚沾臆起視衆星白爛爛我今胡為在長安
思歸路阻多苦寒嗷嗷何處失羣鴈翅濕高飛嗟汝難
歸來行

天下儒冠豈盡誤迂謬棄捐仍道路九月江山凍煙霧
百年裘馬衝霜露窮達自知休怨天歸來且種東陵田
齒過四九已不小釣魚獵兔亦得飽

弘治甲子屆我初度追念往事死生骨肉愴然
動懷擬杜七歌用抒憤抱云耳

吁嗟我生三十三我今十年父不見濁涇日寒關塞黑
杳杳松楸隔秦甸梁王賓客昔全盛我父優游誰不羨
當時携我登朱門舞嬙歌滕爭看面二十年前一回首
往事凋零淚如霰嗚呼一歌兮歌一發北風為我號冬
月

其二

母之生我日初赫缺突無煙榻無席是時家難金鐵鳴
倉皇抱子走且匿父當灼臍無處乞隣里相弔失顏色

男兒有親生不封萬鍾於我乎何益高天蒼蒼白日凍
今辰何辰夕何夕嗚呼二歌兮歌思長吾親儼在孤兒
傍

其三

有弟有弟青雲姿以兄為友兼為師十五徧探古人籍
十九不作今人詩從兄翱翔潞河側寧料為殤返鄉域
孤墳寂寞崔橋西渺渺遊魂泣寒食嗚呼三歌兮歌轉
烈汝雖抱女祀終絕

其四

有姊有姊天一方風蓬搖轉思故鄉歲收秫秉不盈百
男號女啼常在旁黃鳥飛來啄屋角碩鼠唧唧宵近牀
洪河鬪蛟波浪怒我欲濟之難為梁嗚呼四歌兮歌四
闋我本與爾同肉血

其五

古城十家九家空有姊有姊城之中峭壑直下五千尺
雞鳴汲回山日紅犁鋤縱徒把豈得病姑垂白雙耳聾

小孤癡蠢大孤情霜閨夜夜悲迴風嗚呼五歌兮歌五
轉寒崖吹律何時變

其六

冰河蜿蜒雪為岸忽得鯉魚長尺半剖之中有元方書
許我是月來看臘寒歲窮多烈風日暮高樓眼空斷
梁都北來道如砥熟馬輶輪為誰絆嗚呼六歌兮歌未
極原鵠為我無顏色

其七

丈夫生不得志居人下低頭覩面何為者薄祿不救諸
親饑壯志羞稱萬間厦東華軟塵十丈紅入擁簿書出
鞍馬王門好竿不好瑟何如歸樵孟諸野嗚呼七歌兮
歌思停極目南山空翠屏

解俘行

都昌縣南乾沙上射鴈者誰三五羣氍帽紅裘黃戰裙
云是解俘官達軍沙下北風吹艦旗邊軍歡喜家軍悲
朝廷日夜望俘至雪凍俘船猶住茲縣官逃走驛官啼

要錢勒酒仍要鷄姚源遺孽尚反覆爾曹不得誇遼西
飛蟻歎

李子官江西時觀事感心作飛蟻嘆暨西來行也
今朝天光烏鳴喚草萋柳長江渙渙怪爾飛蟻何爛熳
填門撲牕坐我案夜來不虞風驟至屋瓦吹飛船打岸
孤城晦冥霏霏雨前叫鵲鵲後鵲鵲共言此祟飛蟻為
我欲擊之還復歎明明上天非無宰蟻也瑣細何須算
災祥感召固其理先時苟備終無患君不聞漢家滿堂

客不貴徙薪貴焦爛

西來行

冬廿六日十二月西來泛湖雨明滅雨寒著樹盡成雪
天波靈霍路幽絕鵲鶴禿鶩立如人銜魚避船偷眼嗔
天開獵夫會尋汝乘時早可收其身

土兵行

豫章城樓飢啄烏黃狐跳跟追赤狐北風北來江怒湧
土兵攫人人叫呼城外之民徙城內塵埃不見章江途

花裙蠻奴逐婦女白奪釵環換酒沽父老向前語蠻奴
慎勿橫行王法誅華林姚源諸賊徒金帛子女山不如
汝能破之惟汝欲犒賞有酒牛羊猪大者陞官佩綬趨
蠻奴怒言萬里入爾都爾生我生屠我屠勁弓毒矢莫
敢何意氣似欲無彭湖彭湖翩翩飄白旗輕舸蔽水陸
走車黃雲捲地春草死烈火誰分瓦與珠寒崖日月豈
盡照大邦鬼魅難久居天下有道四夷守此輩可使亦
可虞何況土官妻妾俱美酒大肉吹笙竽

癸酉生日

廬山臘日地凍裂白猿鹿啼深雪卧病松林北岸湖
黃蒿古阪行人絕已今行年四十二我辰安在百憂結
小孫呼爺戲牀側縱惱忍能卽嗔說

豆莖行

昨當大風吹雪過湖船無數冰打破冰驤崑崙山嶽立
行人駭觀淚交墮景泰年間一丈雪父老見之無此禍
鄱陽十日路斷截廬山百姓啼寒餓旌竿凍折鼙鼓啞

浙軍楚軍袖手坐將軍部兵蔽江下飛報沿江催豆莖
邑官號呼手足跛馬騾雞犬遺眠卧前時邊達三千軍
五箇病熱死兩箇彎弓值凍不敢發昔何猛毅今何懦
李郭鄴城圍不下裴度淮西手可唾從來強弱不限域
任人豈論小與大當衢寡婦携兒哭秋禾枯槁春難播
縱徒徵科何自出大兒牽羶陸挽馱

餘干行

荒濱鵲立夕啼鵲春行綠岸竹木枯黃蒿破屋走白狐

東至信州西鄱湖男兒輸粟婦刈芻問誰為此軍前須
去年冰雪十丈餘凋瘵至今猶未蘇姚源帶甲已數萬
巖淤莫展金僕姑近聞殺官兵復北道路諠傳真有無
安能飛刀取賊顧貂裘白馬還京都

義魚行

漢江七月黃水漲男婦又魚立江上岸斜波緊煦泡轉
千人目側精相向巧者十义五义中血飛銀尺翻金浪
鰕魚中义獨更穩頓之泥沙半倔强我舟其時行遽此

仰視皇天色惆悵深山藥苗孰流汝一毒江河萬形喪
鱖鮓糜爛不直錢小瑣暴棄同蚶蜆走鯢吞泓若山滾
蹴踏猶能開浩蕩渡子徒誇好身手如飛快漿誰曾傍
夜風大聲吼盤渦地折瀕洞飈鼉鼉如甕之蛟手可得
蛇龍豈復安巢窩消息定理魚奈何

襄陽歌

烈風夜行峴山道天陰城空鬼鳴嘯蒹葭委折波濤白
通濟橋頭老鷓鴣叫人言黃昏虎搏牛牛虎兩傷歸各憂

萬事豈爾能前謀不如置之寬且休君不見百足之虫
光如虹雷火燒死枯樹中

其二

峴石巉巖孤根深下盤厚土雲氣陰中有千萬竅突如
風來遇之如笙琴昨當醉狂推撼此天地忽然為之動
山鳴鬼哭百獸吟我時便欲驅使六丁移之去家遙屋
卑無頓處於乎一石且無頓處徘徊歸來日沉樹

其三

襄陽山勢何所似東如翥鳳西虎蹲墓堆纍纍不空地
於中豈少英雄魂大堤先前花艷時朱樓細柳黃金羈
但看舊園歌舞處掘發金釵知是誰君今有酒不飲恨
不駟馬軒車馳縱及金張許史將焉為身後埋沒蒿草
疇見知

其四

昨來三日雨不住逢人面色如地皮老龍之堤豈易打
襄陽難是養魚池南倒江勢雖洶湧我堤如山撼不動

但慮禍患起細微丁寧疆吏防覬孔我聞斯地連年乖
雨暘二麥乾死秋禾傷衆心詢詢久未定小兒何得跳
商羊天公好生民壽康

苦雨篇

波濤日陷蛙鳴起梁園一夜滿城水屋廬半塌塌人死
可憐哭聲水聲裏憶昨出飲黃昏歸零濛已灑力尚微
豈知中宵鬼神怒雷翻電滾雨如注我時怵惕不得眠
牕燈撲殺無計燃洶湧一任霹靂走恍惚若有蛟龍纏

地軸震仄久益急披衣起坐坐復立雞鳴氣勢辛稍緩
積漸天明日光入琴沾書濕開我堂二儀高下雲低昂
黃鸝晒翅燕語梁前何恐懼今何康萬事夷險誰豫量
及時弗樂頭顱蒼

苦雨後篇

小兒嚙啞始學語育之後屋逢今雨包裹移置夜我旁
兒驚屢呌安之乳霆雷號號屋瓦震疾電繞床亂走鼠
大兒明農隔城住即有緩急誰視汝旦日報至心則降

雨未傷人傷稷黍前時三月點雨無大兒憂色禾半枯
日日望雨雨反荼盪然畎畝為江湖天晴微風波水動
溝渠四注長河湧明晦反覆何代無囑兒更備宜秋種
久雨東黃子

微晴見月月仰瓦城中水淹雨猶下郊園決旬不一出
不畏衝泥畏沒馬苔蘚自上匡氏壁蓬蒿日深仲蔚舍
人言甲子船入市幸君豫問能舟者

初雨夏
甲子也

種竹

自從有竹水爛死使我竟日顏不歡頃來移置復傍此
遽覺六月回秋寒龍姿鳳苞生不易可憐蕪沒今人棄
窈窕郊園草樹中何人道有凌雲器

放蛇引

花蛇錯落五色備毀垣掘出蛇驚悸昂頭宛頸若有訴
盤旋瞥捩如奔避深山大澤豈無窟荒郊短草真何意
豺虎公然白晝行花蛇何得更縱橫祇知毒口能戕物
未解皇天實好生洪流自古容微細吾叱園丁縱蛇逝

風驅雷霆急雨過彩虹倒掛青天霽

歲暮四篇

天霜草枯風波濤愚心恐懼賢心勞羣聚飢獸野鳴號
高飛路逆鴻嗷嗷有狐河梁間且得冰行綏綏奈爾曹

其二

百騎橫矛血提刀我軍菜色馬蝟毛誰謂河廣不容舠
北旗獵獵風黃蒿可憐十羊抗一虎塵沙暗河暮淮浦

其三

長風烈烈吹山寒有松瑟瑟山之端鋪蕤布蔭庇小草
霜勢雪力莫可干皐蘭晚蕙日摧隕美而不遇良可嘆

其四

枯蓬飛沙原野昏律窮物慘生意存向夕氣嚴扃我門
霜白月凍啼夜鷗圍爐煨芋啖濁酒有話細與妻兒論
徒涉嘆

兩山欲交水斷破洪川無梁日漸墮徒涉紛紛江復深
鼉喧龍鬬真愁心無言旣濟平安子得路回看轉不禁

君不見岼風翻翻卷瓠葉皇天倘賜築巖楫

松泉子歌

顛崖嶮嶺撐一松鐵幹屈曲如老龍精靈歲久發光彩
寒凝古翠芙蓉峰石泉清冷日漱洗汨湍瑟颭松風裏
山人何年住其側手斲伏苓煮泉水近來蕭灑落風塵
賣藥救世能通神我勸山人且勿歸金鏡玉珎行陽春
飛星篇

十月廿七昏尚坐一星出垣如斗大碎光萬點長燭天

軒牖盡明向西墮俗子蒙頭不讀書魯人鐘鼓拜爰居
天道悠悠誰復知世間魚目為明珠

吟思翁

吟思翁翁我思蒼松碧梧世希有海月紅雲如見之孤
鶴引唳志在萬里吞舟之魚豈遊涔水嗟嗟噫嘻我思
者翁翁思者何停雲日暮滄溟波

鈴山堂歌

先生昔隨玄豹住丹壑冥濛日烟霧先生今與赤龍飛

南望碧山空翠微茅堂蒼蒼雲氣入囊琴鎖戶陰陰濕
沁蘭沙溫春鳥暮庭松月清夜鶴立君不見山下石崕
畠千尺磯經年不釣苔成衣玉璜羊裘各有分可問王
孫歸不歸

空同集卷十九

欽定四庫全書

空同集卷二十

明 李夢陽 撰

七言古

送何舍人齋詔南紀諸鎮

先皇乘龍去不返悲風慘淡吹宸極四海哭若喪慈母
百官狂走天為黑憶昨臨危坐御床手挈神器歸今皇
密語丁寧肺腑裂三老親聞眼流血金滕立剖石室秘
此事難從外人說我君謙讓不可得割哀踐阼弘祖烈

日月重懸萬國朝雷雨赦過羣方悅越南海北霹靂動
蠻夷盡奉王正月此時九道使臣出舍人亦輟螭頭筆
白馬朝騰薊北雲錦帆暮閃江沱日江沱秋交多烈風
洞庭雲夢俱眼空巴陵縣令舍人兄接詔會弟西樓中
童年題詩在高壁六載不到紗為籠南嶽以南惟峻山
苦蒸毒霧何盤盤天王新令雷電掣妖蛇不敢啼林端
五溪官長喘喙拜黔州父老垂淚看却瞻蒼梧雲氣黑
斑竹臨江怨幽色翠華縹緲空冥間此時此恨誰知得

君不見馬援柱孔明碑剝落黃蒿裏千年莓苔待君洗
萬里之行自此始歸來何以獻天子

上元訪杜鍊師

宣皇昔時乘八風御龍遊戲行煙空馬前兩兩侍玉女
別館多在蓬萊宮朝天宮中舊時殿樓臺畫鎖無人見
琉璃井塌青苔滿松柏森森月如練嗚呼往事難具陳
燈火如山又一春北斗壇西訪隱淪我師黃衫白氍巾
坐我更致西樓賓玉杯漱灑赤瑪瑙織罽四角銀麒麟

酒肉山堆滿堂醉仙厨往往來八珍孝宗之朝五真人
師也磊落當其倫自言召見親賜食曾把丹書獻紫宸
如今寂寞看春色銀魚玉帶無消息豈惟魚帶無消息
欲語吞聲淚沾臆勸師對此莫酸辛世間萬事如轉輪
且將芝草供生計聊與煙霞作主人月徧彩雲當牖生
旋呼兩童吹玉笙聞師妙得逡巡術百壺倒盡還須傾
古來仙子向誰在飲者翻垂千載名名垂千載亦區區
酒闌燈昏夜復徂不見秦陵草已宿春生樹啼雙老烏

此時亦應羣帝趨金燈翠旗光有無

奉送大司馬劉公歸東山草堂歌

東山有草堂縹緲雲嶠孤前對祝融峰下瞰巴陵湖
明公昔時此堂居麋鹿熊豕當窻趨洞庭日落風浪湧
倒影射堂堂欲動慘淡誰聞紫芝曲獨善不救蒼生哭
先帝親裁五色詔老臣曾受三朝祿此時邊徼多戰聲
曳履謁帝登承明謝安笑却淮淝敵魏相坐測單于兵
九重移榻數召見夾城日高未下殿英謀密語人不知
左

右微聞至尊羨自從龍去不可攀公亦臥病思東山湘
娥含笑倚竹立山鬼窈窕堂之側上書苦死只欲歸聖
旨優容意悽惻內府盤螭縷金織賜出傾朝皆動色白
金之鋌紅票記寶鈔生硬雅翎黑崇文城門水雲白是
日觀者塗路塞城中冠蓋盡追送塵埃不見長安陌人
生富貴豈有極男兒要在能死國不爾抽身早亦得君
不見漢二疏千載想慕傳畫圖卽如草堂何處無祿食
覩竊胡為乎乃知我公真丈夫嗚呼乃知我公真丈夫

二月四日部署宴餞徐顧二子

春日載陽官署幽東吳二子過我游庭空日斜吏人散
窅然何異經林丘今晨驚蟄暖氣達昨夜哀鴻呼故儔
中庭古槐蒼蘚溽上有百鳥何啁啾倉庚交交刷其羽
君看巨細各有求明時冠軒幾邂逅得暇胡不攀淹留
自從去年識徐顧令我意氣傾南州徐郎近買洞庭施
顧子亦具錢塘舟浮生飄轉若飛藿倏忽聚散誰能謀
風光爛熳况復爾願寫清壺銷客憂故人苦稱不好飲

舉杯入脣還復休妙歌時時激慷慨鄙夫何以答綢繆
嚴析沉沉靜夜色北斗倒掛城南樓祇恐天明驅馬出
攬袂延望河之洲

七峰歌壽范郎中淵

我聞桂陽江上峰平地突出芙蓉三峰峒亭如列戟
四峰裊裊翔飛龍孤水東來走其下上巖下巖惟古松
有時雲霧滿四壑洞中仙侶時相逢使君磊落中行後
家傍前峰對江口暗想精靈盤礴初嶽降生申理或有

平生氣與蒼壁高落筆煙霞常在手六載為郎不愛身
五十生兒將白首湘南新鮓紅勝玉燕京高會多名酒
歲歲登堂娛笑歌歌我七峰為爾壽

送人還關中

得萬字

君不見劉毅貧時一擲常百萬君不見唐時鄭虔道高
坎壈腹無飯英雄際會各有時人生豈必皆如願關中
老翁燕薊客昔何慷慨今何怨王通無媒翻叩關揚雄
有賦何由獻君歸射獵南山麓得錢且學樊侯販

寄兵備高僉事江

三月無雨乾殺麥六月雨多禾耳黑長江浪高蛟龍鬪
淘河鵝鵝啼清晝此時憐君備吳越天陰不見日與月
白衫鹽徒慣風濤我軍慎勿貪倉猝

寄內弟王

自汝林居將一月我心不寧長惻惻郊寒歲暮風色苦
曠野無鄰天雨雪亟欲載酒往問子水路難行畏蹒跚
豈無輕裘與快馬玉也視之如敝屣此道於今識者稀

勸弟寬懷慎藥物

雪東鄭生

夜來雪花如掌大無事閉門但眠臥僵牛死馬非所慮
天翻地裂疇能那近時好事最者誰徽州鄭生差愛我
甕頭春酒不餘瀝天明梳洗午尚坐北風其涼二儀閉
雪吹飛沙映天過老夫畏寒況無力生也乃是雄豪佐
梁園之陌平若掌放兔呼鷹無不可不然騎驢學爾祖
乘興一鼓山陰柁

吁嗟行示周生

吁嗟周生千里駒今行不得如蟾蜍雖有寶劍寒吹毛
一日不遇成鈎刀子不見豐城紫氣干雲霄鹽車之下
多悲號張華伯樂行相遭

送鄭器

梁園仲冬雪積阻慘慘風亂平沙樹泥深馬瘦不得行
縹緲金陵在何處青絲絡酒提玉瓶強出送子城東亭
旦望淮河暮江水雲飛鴻鴈天冥冥

寄鮑宇

愧我夷門草堂寂種菊蕪穢生蓬蒿爾家華堂近江潯
開花爛熳秋雲高去年此日同為客今年對菊遙相憶
黃山練水在何處獨倚南牕望南國

三鶴歌為丘三公壽亦載厥實事焉

老鶴東來度海水與雌俱飛引其子回翔萬里始一息
丘家麥田澤泚泚逍遙洗濯飲食足炯如煙雪無泥滓
此鳥千年丹始成口銜赤玉蒼龍精落地化作金光草

采食還丹毛骨輕古來拔宅將妻子肯使丘翁地上行
君不見贈鄭莊

君不見江上鴈嗷嗷喚儔侶勁羽輕毛常趁風往來漂
泊如羈旅男兒落地既有身誰能齷齪猶婦人懷中有
劍亦不貧吳下阿蒙君莫嗔

嗚呼行寄康子以其越貨之警

嗚呼皇天不可測一冬無雪春無雨黃霾翻風白日動
前飛禿鷲後飛鴟堂堂古路長蒺藜萬家之城走豺虎

百姓誅求杼軸空兒號女啼守環堵饑寒盡化為盜賊
可惜良民作囚虜腰弓帶箭百成羣少年馳馬仰射雲
蒼山日落行旅稀醉唱胡歌各自歸山東趙實已授首
南陽回賊同猪狗諸君但欲樹功業玉石俱焚理或有
近者內丘大寧河橫賊八騎持干戈裕州知州與賊戰
康也扶柩衝之過資糧蕩盡僅身免月暗天昏路途遠
吉人作善翻輒軻痛哭寒城白雲返頃聞留滞在襄國
百口仰給縣官食吾兄匹馬走問之半月更復無消息

夜立中庭北極高
晝看河朔風沙黑
汝寧以南土尤赤
空城二月生荆棘
斗米可以換嬌女
牛馬餓死楷蒿側
比來官吏守空印
拖男抱女盡向北
卽防此輩更充斥
恐汝後歸歸不得

送席副使監貴州屯學二事歌

席名書字
文同蜀人

我昔在北京送君向河南
豈料在河南送君如百蠻
瘴雲蒼蒼途路艱
牂牁羅施皆峻山
法官要自褰帷入
倏忽開明衆山出
大抵夷狄似禽鳥
制之雖勤忌拘急
此

曹亦是人心性項來漸慕衣冠習文翁化蜀豈無本李
牧屯田務招輯所恨故人限萬里令我蚤夜心於邑丈
夫已際飛龍會野人猶抱枯魚泣感新懷舊心肺酸萬
事回頭百憂集弘治之間時世異與君次第陳封事許
身謬比漢賈生推君每稱唐陸贄朝回對坐香爐省出
門並結青雲轡自從分手哭遺弓縉紳漂泊余亦同抱
甕梁王修竹園遺址宋帝蓬萊宮生涯放逐似羈旅混
迹迂腐隨村翁曾聞伏檻有老馬豈卽道路傷秋蓬天

下瘡痍況未息西南貢篚防難通杜鵬向識君臣禮蛟
龍終收雲雨功相如諭蜀文章壯馬援平交德業雄扶
危濟弱付公等臨歧悵望天南鴻

送鮑漱還歙

昔時賢達或未遇途路坎坷常固窮鹽車騏驥亦拋棄
人生豈得無西東君年五十猶未通江湖去住隨飛鴻
黃山紫陽日索寞題詩蚤向軒轅宮

送鮑相如金陵

去冬君行雪積阻相送城東念羈旅今冬相逢不逾月
再別令我情更苦金陵市頭酒如蜜此去酣歌與誰侶
我在梁園獨岑寂莫教碧草生春渚

君不見贈馬僉事應祥

君不見庭中樹今冬憔悴春作花君不見桑上草含陽
藉土抽紫葩富貴詎有種貧賤豈無涯君今身為指南
車何不留之殿京華北游漢水南長沙君雖在漢水與
長沙高不愁虎卑無蛇

得馮御史允中書

鳳皇不識梧桐樹一落蓬蒿鳥雀欺
滄洲鴻鵠長毛羽縱有雲羅奈爾為
昨日柳陽馮侍御臨流寄我錦雙魚
黃河峻嶒雪十丈過臘逢春始得書
開緘不見下江舸梅花滿枝空淚予

秋夜徐編修宅宴別醉歌

徐郎三杯拂劍且莫舞聽我擊節歌
今古曲長調悲不易竟天地熒熒月
東吐燕山八月風力怒落葉交加映

尊俎愴時感事百憂集死別生離同一苦身逢累朝全
盛日弘治之間我親覩朝廷無事尚恭默天下書計歸
臺府五陵鞍馬速雷電千官氣勢如風雨却憶年年秋
月時日與爾輩同襟期如澠之酒差快意袒跣呼號百
不思絃張柱促衣冠禍綜覈崩奔學士疲倉皇世事難
開口物極則還理宜有羸疾已分沙田草遭逢復折都
門柳富貴在天得有命人生反覆如翻手不見去年臨
別處吞聲躑躅鶯求友邂逅寒暄不自知隔絕榮華為

誰守歌殘酒乾天欲曙門外驪駒已西首哀鳴胡鴈亦
南飛露濕羣星朝北斗

發京別錢邊二子

秋風淅淅吹燕山游子仗劍出燕關車脂馬飽夜將發
錢邊二子來相攀此時羣星覲上帝驂鸞翳鳳雲之際
君不見牽牛與織女一水盈盈獨流涕

東園翁歌

東園翁今六十餘面常泥垢髮不梳身藏寶劍人不識

反閉衡門讀古書此翁十五二十時歎唾落地迸成珠
陸機不敢以伯仲管輅警歛空嗟吁生鱗卽與蛟龍伍
未汗寧同凡馬趨爾時射策黃金闕三百人中最英發
騂騮舉足狹萬里便欲登天攬日月豈知德尊常輶軻
獨買扁舟泛吳越三十年來萬事變富貴於我真毫髮
歸來灌園種瓊花荷鋤自理東門瓜夜眠海月掛丹牖
晝看江風滾白沙遼東合有逢萌宅齊西再覩陶朱家
北郡李生三十六擯斥高歌臥空谷前輩後輩道豈殊

同坐同行限江麓東望東園亂心曲安得逐爾騎鴻鵠

苦熱東屠叅議

豫章之熱真毒淫六月已破仍不禁赤雲行空日在地
萬里一望炎煙深東蒸扶桑榦欲槁黑河水乾龍不吟
院松亭亭我所愛比遭摧炙無好陰縱令跣足欲何往
此地寸冰如寸金屬簷大厦尚喘喙矮屋茅堂淚滿襟
滕王有閣高百尋閣下澄江清映心紫薇使者臥其上
卷幔恰對西山岑赤脚門子搖大扇行坐吟哦揮素琴

幾欲往訪簿書積豈我無酒同誰斟
亭午蘊隆潭水沸蛟蜃下徙鼃鼃
沉何況走原獸棲枝禽嗚呼豫章之
熱其苦有如此而我胡為營營與世
爭華替

白鹿洞別諸生

東南自有匡廬山遂與天地增藩衛
山根插入彭蠡湖崢嶸背殺三江勢
地因人勝古有語於乎萬物隨興廢
學館琳宮客不棲千巖萬壑堪流涕
文采昔賢今尚存講堂寂寞對松門
松門桂華秋月圓拄杖高尋萬古源

梅嶺古色照石鏡扶桑丹霞迎我軒絕頂坐歌霜月淨
石潭洗足芝草繁更有冠者五六人峭岨窮嶂同攀蹇
草行有時聞過虎旦暮時復啼清猿我今胡為公務牽
蟋蟀在戶難久延出山車馬走相送落日遂上鄱陽船
生徒繚戀集涯潯孤帆月照仍留連情深過厚亦其禮
謏薄竊愧勞諸賢明朝伐鼓凌浩蕩五峰雙劍生秋煙
豫章遇鍾子送贈

豫章八月江勢輕水關行馬沙觜平聞君纜舟挽君住

向夕惡風銀浪生
頃時收帆萬船集
波顛石倒蛟龍立
中流艤子獨何意
歌仄猶搖雙槳入
天清未風君已迴
帆色迢迢萬里來
拂衣漢口鳬鴈亂
擊榜南浦芙蓉開
漢口逢君又南浦
人生聚散風中雨
黃石公赤松子在
何所君今抽簪我
簪組

董公衙賞緋桃行

吁嗟董公垂老官
不遷途雖坎坎坷
志不變三歲提兵
兩列銜此事堪傷
亦堪羨二月南風
捲章水黃昏西省
開

芳宴刑司軍司皆集衙盆中緋桃俄放花董公捋鬚向
客誇客起環視咸咨嗟情酣展轉移燈照酒氣撲花花
欲笑逢人合與世酩酊衰顏苦被春勾調君不見玄都
觀裏樹不與武陵源上殊時來開落各異地董公董公
今宵與客且倒花前壺

得家書寄兄歌

三年路遙消息阻緘書實凍兄心苦鴻鴈無愁奮翅難
鵲鴿且暫遊寒渚時望東湖西日微雪冬廬嶽北思歸

獨虞四海干戈滿生別悲傷見面稀

寄鄭生歌

南康烈風無時休將歸船滯增煩憂空城雪埋狐兔走
十日凍合鼉河洲廬山咫尺不得往汝在梁園獨子想
開緘歎恨東遊阻琅玕天姥春空長

余鄒二子遊白鹿書院歌

洞原路氷山徑微二子日遊過夜歸巖宮古刻徧覽讀
馬時蹌跌泥在衣頃來烈風號季冬雪霾不見五老峰

苦心數子守寂寞我病講堂虛鼓鐘二子此行真特奇
異時獨往今可知虎吟狐啼且不懼肯使楊朱泣路岐
戲贈周紀善

廣文先生何為者十欲出門九借馬只今徒步裹水濱
衰鬢漠漠常風塵鳳皇在笄雞啄食昔宿闌干半青黑
君不見楚筵醴罷暮歸來甌塵妻子無顏色

龍沙行別袁生

君不見玉虛觀前松去年凍乾今復生樹靈力排雷雨

會幹大每與蛟龍爭下有萬古不定之龍沙風滾無時
休英雄奮發各有時運至賈販皆公侯腐草尚為螢何
況堂堂七尺軀萬物之靈高牙大纛苟不我石泉白雲
誰復爭舉眼江漢鴻冥冥與爾倒此沙頭瓶

潯陽寄毛君湖口

大江六月涼風發匡廬清波滾明月削出萬朵青芙蓉
水底搖動金銀闕美人盈盈坐湖縣昏叩石鐘曙睇髮
悵望迢迢碧雲合早晚扁舟向蠻越

鄭生山遊歸予作此歌

跋予望之六六峰欲往爭奈今嚴冬石林崎嶇積雪盛
日中無煙虎豹病生也孤往胡所希凍攀幽嶮探其微
手皴面黑逾旬歸太室少室何者奇曾否首陽歌采薇
北邙逶迤清洛遠天白冰崇伊闕晚灞上騎驢爾靡辱
袁安高臥吾應覩忽然想生經行宋家陵往來寂寞東
西京翹首淚下嵩山青

丈人行

大人九十牙齒存行曳竹杖挈玄孫只知灌園同漢陰
何須采藥游鹿門山房春歸碧草萋蕙帳月白露滿蹊
少微星沈湖水湧松林夜夜猿嘯啼

鶴癯子歌

鶴癯子汝人也而何為乎鶴形美髯修修雙瞳青閉肆
夜讀黃庭經晨出荷鏡掘茯苓鶴癯子汝豈無萬里骨
刀劒翮路遙朋寡日云暮弱水蓬瀛壯心隔君不見江
中老龍亦高臥鶴乎鶴乎誰汝那

寄殷給事之歌

斑鳩賦形百鳥內化為蒼鷹百鳥避秋空萬里試一擊
灑毛紛紛稱鷹意迴旋簸蕩風沙開海寧光清鸞鳳來
天地炯炯元精回此以贈君君毋猜金陵雖隔黃金臺
汝翊紫蓋臨三台飛章御覽不十日道路聞靜豺狼哀
憶昔匹馬長安走殷何徐陸皆吾友楚姬娉婷華色並
殷生稜眉獨方口何卽短小亦不醜仇離今各經年久
夢寐猶存上苑花飄零寂寞西湖柳丈夫致身貴不朽

陟要階華亦何有賈誼才名信早知姚崇相位非難取
大江滾滾東北趨羣龍霜蟄鼉叫呼汝登鳳臺念老夫
為我致一鳳之雛我不敢玩亦不敢狎誠心餵飼毛羽
全使聽簫韶翔舜都

送田生赴京歌

正月八日天驟黃大風晝晦沙飛揚河水慄烈人不行
駕鵝鵠鴈交踉蹌黃鵠呼曹厲毛翼一舉橫天向天北
君不見左生北上田生俱長安走馬花九衢

送陳冠歌

虎子墮地氣已虜驄驪汗血自為駒陳生垂髫骨卽殊
雙瞳炯炯唾成珠前年汝與計吏俱承明謁帝未生鬚
丈夫志欲日月並雲雨且使蛟龍須冬風獵獵吹楚湖
憐汝送母催楚艫調羹臘盡江門水戲彩春停汴上都
憶昔乘驄按南國汝在諸生獨英特三秋自阻北飛鴈
萬里今逢舊顏色私計彭宣晚必親敢言裴儉前能識
寒溫始知君子厚杖屨翻增世人惑瓠子柳烟風日和

力疾送子臨黃河汝親日望泥金使老夫擬作瓊林歌
芝样行

崑崙子之來也李子觴焉及夜瓶芝自墮以為样
行觴焉平可檠二觴行之穩持之輕客大駭笑歡
盡醉而李子賦詩

霜嚴夜清月在南燈明酒溫客氣酣銅瓶玉芝鏗墮地
客將傳玩誇神異仰芝把蒂行金杯蒼文古紫當筵開
已驚瀲灩茁茁動更詫屈錯蛟龍迴憶芝初出盤精氣

雲流石立翹翹避赤箭琅玕色盡枯神訶鬼守求非易
泄秘真遭天地怒懷珍顧使時人忌自從獲芝升我堂
琴書几席俱輝光晴日徐看瑞氣合炎天每挹仙雲涼
燕山豪士來何方悲歌起舞宵未央芝乎自銜亦太異
頻令四座深杯觴觴行逶迤月轉白月色芝光巧相射
醅醕觸擊瑪瑙碎淋漓迸落真珠赤君不見玉屈卮金
叵羅珠花繡草枉自艷停杯聽我芝拌歌

劉子有金陵之差遂便覲省

使君昔居紫荊關日登燕嶠望吳山逢人顏色鬱黯黯
對酒涕泗交潺湲使君南向金陵去孤帆夜拂春天樹
旅枕常欹月落時夢魂先到雲飛處揚子江頭青草斜
大孤山前開杏花行人三月重回首游子一年初到家
出門烟草滿芳甸鳳皇臺接麒麟殿遊陌聯翩追宿娛
墨場婉孌羅賓譙人生意氣無南北白馬青袍動江色
卽看艤舸石頭城還聞稅鞅鍾山側鍾山翠篠壓秦淮
燕趙風雲入望來芙蓉秋鴈多愁思問君何日錦帆迴

送仲副使赴陝西

驄馬白玉鞍長鳴下雲端今朝發汴水何日到長安孝
王臺前雪如山垂楊掃地春風還使君不帶冰霜色却
帶春風入漢關相思明月樓西望古秦州河南咫尺不
可見何況千山萬水頭西望秦州是我鄉隴樹秦雲空
斷腸褰帷仗鉞經行地欲寄雙魚到慶陽

徐子將適湖湘余實戀戀難別走筆長句述一

代文人之盛兼寓祝望焉耳

崢嶸百年會浩蕩觀人文建安與黃初叱咤皆風雲大
歷熙寧各有人戛金敲玉何繽紛高皇揮戈造日月草
昧之際崇儒紳英雄杖策集軍門金華數子真絕倫宣
德文體多渾淪偉哉東里廊廟珍我師崛起楊與李力
挽一髮回千鈞天球銀甕世希絕鰲掣鯨翻難具陳洪
川無梁不可越日暮悵望勞余神徐郎生長蘇臺陰二
十作賦雄海濱竭來抱玉叩閭闔長安繡陌行麒麟是
時少年誰最文太常邊丞何舍人舍人飄飄使南極直

窮金馬探瀘津爾雖不卽見顏色夢中彷彿形貌真余
也潦倒簿書客諸公磊落清妙身大賢衣鉢豈虛擲應
須爾輩揚其塵休令黼黻怨岑寂要與琬琰增嶙峋海
陵先生雅愛士晚得徐郎道氣伸喬王款接雖不數邇
聞亦欲來卜鄰驂騑造父兩相值一瞬萬里誰能馴都
門二月芳草發御溝楊柳垂條新徐郎綰牒將遠適使
我旦夕生悲辛為君沽酒上高樓月前醉舞梨花春天
明掛帆向何處鴻鴈哀鳴求故羣南登會稽探禹穴西

浮湘水弔靈均洞庭波寒木葉下峽口風急猿嘯聞司馬太史有遺躅歸來著書追獲麟

龍州歌送沈編修使安南

龍州南接六那溪白鷗黑猿相間啼烏蠻灘頭苦竹密
伏波廟前春日西揚旌走馬迎天使擁節封王壯漢儀
試向殊邦觀禮樂交南元是舊邊陲

漢江歌送范子之桂陽

漢江江上鷓鴣鳴漢江遊客無限情青山落日下帆影


芳草月明聞櫂聲黃鶴磯頭暮雲盡鸚鵡洲邊春水生
莫倚仲宣能作賦洞庭南接桂陽城

聊城歌送顧明府

聊城纍纍枕桑野使君懷古聊城下龍蛇慘淡七雄關
當時誰是排紛者海東隱淪難見面平原不見安平見
已聞笑却邯鄲軍還遣書飛燕將箭平生急難輕列侯
功成豈必千金酬只今往迹浮雲盡遙矚滄溟日暮流

畫鷹歌贈鮑帥

鵞鳥決皆如愁胡猛將氣每吞匈奴自將黑鷹掛堂壁
百鳥窺之不敢呼安得此鷹生卽起擊兔擒狐日千里
將軍彎弓騎紫騮一箭射天落旄頭



空同集卷二十